

Kulturikkut ingerlatsineq sunngiffimmilu sammisassaqaartitsineq pillugit Inatsisartut inatsisaata allanngortinneqarnissaa siunertaralugu Naalakkersuisut peqquneqarnissaannik Inatsisartut aalajangiiffigisassaattut siunnersuut. Inatsimmi piumasaqaataasut appartinnerisigut kommunini inoqarfiit ukiut tamarmik kulturikkut ingerlatsineq sunngiffimmilu sammisassaqaartitsineq pilersaarusiortalissavaat.

(Inatsisartunut Ilaasortaq Mimi Karlsen, Inuit Ataqtigiit)

Akissuteqaat

(Ilinniartitaanermut, Kultureqarnermut, Timersornermut Ilageeqarnermullu Naalakkersuisoq)

Siullermeerneqarnera

Naalakkersuisut sinnerlugit siunnersuutinnut qujavunga.

Sunngiffimmi atuartitsisarneq inuiaqatigiit atugarissaartuunissaannut, peqatigiinnissaannut inuunerlu naallugu ilinniagaqartarnissaannut pingaaruteqarluinnartuuvoq. Naalakkersuisut siunnersuuteqartup nunami tamarmi kulturikkut sunngiffimmilu sammisaqaartitsinermi peqataasunut pitsaasunik atoruminartunillu atuagassaqaartitsinissap ingerlaavartumik qulakkeerneqartarnissaata pingaaruteqassusaanik oqaaseqarnera isumaqatigivaat.

Naalakkersuisut suliamut atatillugu akissuteqaatissamut tapiliussassanik kommuninut tamanut pissarsiniarsimapput, kommunalbestyrelsit tassaammata sunngiffimmi atuartussanik pilersitsisartut, tassungalu atatillugu unammilligassaasinnaasunik ilisimasaqarluartut. Qeqqata Kommunianit akissuteqaammik taamaallaat tigusaqartoqarsimavoq.

Kommunip akissuteqaammimi takutippaa, siunnersuut suliamut atatillugu ajornartorsiuteqartoqarneranik ersersitsisoq, peqatigitilluguli susasaqarfimmi unammilligassat peqataasinnaasunut minnerpaamik piumasaqaammit sulii ilungersunarnerusut aamma takutillugu.

Kommunimit ilaatigut oqaatigineqarpoq, sunngiffimmi atuartartut ikileriarsimanerannut peqataasut amerlassusiannik minnerpaamik piumasaqaateqarneq nassuiaatigiinnarneqarsinnaanngitsoq. Kommunimit erseqqissaassutigineqarpoq, ilinniartitsisussarsiortarneq, aningaasaqarnikkut atugassarititaasut kiisalu najukkami pissutsit unammillernartunut aamma ilaalluinnartut. Kommunimit assersuutigalugu ilisimatitsissutigineqarpoq, Sisimiuni sunngiffimmi atuartut 16-iniit 5-inut ikileriarsimasut, tamatumalu takutikkaa aaqqissuusaanikkut unammilligassaartoq, peqataasinnaasut amerlassusissaannik piumasaqaatip sakkukillineqarneratigut aaqqiineqartussaasariaqanngitsut.

Kommunimit peqatigitillugu ilisimatitsissutigineqarpoq, sunngiffimmi ilinniartitsisinnaasunik sulisussarsiortarnermi ajornartorsiuteqartarlutik. Ajornartorsiut tamanna sunngiffimmi atuartitsissutissanik neqeroorteqarnissamut aporfittut annertuutut nalilerneqarpoq, taamalu eqqarsaasersuuteqaqqinnermut ilanngunneqartariaqarluni.

Tamatuma saniatigut nunaqarfinni inoqarfinnilu mikinerusuni atugassarititaasut illoqarfinni pissutsinut sanilliullugit allaanerulluinnartut – innuttaasut amerlassusaat, ilinniartitsisussaqaarniarneq najukkamilu isumalluutit eqqarsaatigalugit. Kommunimit taamaammat inassutigineqarpoq, inatsimmi eqaannerusunik imaluunniit

assigiinngiiaarnerusunik atugassaqaqtitsinissamut periarfissiisoqassasoq, peqataasinnaasut amerlassusissaannik piumasagaatip sakkukillinissaanut sanilliullugu najukkat assigiinngitsuunerat eqqarsaatigalugu.

Naalackersuisut isummanut taakkununga ilaliipput, oqaatigalugulu illoqarfiit nunaqarfiillu pineqartillugit assigiinngisitaarnerusumik suliaqartarnissaq pisariaqarsinnaasoq. Naalackersuisuniilli erseqqissaassutigineqassaaq, kommunalbestyrelsi peqataasut amerlassusissaannik piumasagaammit avaqquassinissamut periarfissaqareemat, tak. Kulturikkut ingerlatsineq sunngiffimmilu sammisassaqaqtitsineq pillugit Inatsisartut inatsisaanni § 11, imm. 2.

Sunngiffimmi atuartitsinermut peqataasut amerlassusissaannik piumasagaatit ukunani takuneqarsinnaapput, § 11, imm. 1, nr. 7, taamaattoq tak. § 11, imm. 2, § 16, imm. 2 aamma § 17, imm. 2.

Kiisalu Kulturikkut ingerlatsineq sunngiffimmilu sammisassaqaqtitsineq pillugit Inatsisartut inatsisaani § 4-mi takuneqarsinnaavoq, kommunalbestyrelsi ukiut tamaasa kommunimi kulturikkut sunngiffimmilu sammisassaqaqtitsinissamut pilersaarusiortartussaasoq.

Eqikkarlugu Naalackersuisut nalilerpaat siunnersuutip ersersikkaa suliamut atatillugu pingaarutilinnik attuumassutilinnillu ajornartorsiuteqartoqarnera, taamaattoq kommuninik oqaloqatiginninnerit pisariaqartut, inatsimmit allanngortitsisinnaanerit ajornartorsiutaasorpiaat aaqiivigineqarnissaat pillugit – ilanngullugit sulisussarsiortarnerit, aningaasaqarneq piffinnilu assigiinngissutsit.

Naalackersuisut taamatut oqaaseqarlutik imatut allanngutiissatut siunnersuuteqarput:

“Kulturikkut ingerlatsineq sunngiffimmilu sammisassaqaqtitsineq pillugit inatsisartut Inatsisaat aallaavigalugu sunngiffimmi neqeroorutit pillugit kommuunit oqaloqatigineqarnissaannut Naalackersuisut peqquneqassasut siunertaralugu sunngiffimmi neqeroorutit siuarsarneqarlutillu nutarterneqarnissaat, aammalu kommunini inoqarfiit ukiut tamaasa kulturikkut ingerlatsineq sunngiffimmilu sammisassaqaqtitsineq pillugu pilersaarusiortarnermut kommuunit peqatigalugit anguniakkat, sinaakutit imarisaallu aalajangersarneqarnissaannut Inatsisartut aalajangiiffigisassaattut siunnersuut.”